

HEADLINES ( EVENING )

Date – 25/05/2026

Time - 18:30 -18:40Hrs

- Rampumah tuialhthei man a pung leh a, Aizawlah chuan petrol hi litre-1 cheng106.39 leh diesel litre-1 cheng 95.07 a ni mek a ni.
- MZP chuan Tourism Director rawih nawn chu a bang emaw, a ruat nawna order hi sût emaw a nih loh chuan an pisa kai tur dan chhonzawm an rel.
- Indian Meterological Dept New Delhi hmuhlawk danin, Mizoramah naktuk atangin fur a intan ang.
- President Droupadi Murmu-i chuan vawiin khan Rashtrapati Bhavan-ah Civil mite chawimawina Padma Award a sem.



PETROL PRICE HIKE

Rampumah tuialhthei man a pung leh a, Aizawlah chuan petrol hi litre-1 cheng106.39 leh diesel litre-1 cheng 95.07 a ni mek a ni.

All Mizoram Petroluem Dealers Association (AMPEDA) President Pu K Lalnghakliana chuan petrol leh diesel-ah lungngaihna tur a awm loh thu a sawirualin, Mizoram tuialhthei dahkhawmna (oil depot) a mamawh thu a sawi.

Tunhnaiah India ramah tuialhthei man a che nasa hle a, tunthla ni 15 khan a vawi khat nan chein, vawiin thleng hian ni 11 chungin vawi 5 a danglam tawh a ni. Tukina tuialhthei man punna hi litre khatah petrol Rs 2 leh pawisa 58 a ni a, diesel chu Rs 2 leh pawisa 56 a ni.

Akashvani News Aizawl zawhna chhangin AMPEDA President Pu K Lalnghakliana tunthla ni 15 khan petrol man Rs 3 leh pawisa 02 leh diesel man Rs 2 leh pawisa 89-in a pung a, kha kha a pun san ber niin tukina a punna hi a sang ber dawttu a ni, a ti a; May 16 khan petrol leh diesel man hi pawisa 6 ve vein tlahniam leh mahse, May ni 18 khan pawisa 80 ve vea a pun thu leh May ni 23, Inrinni khan litre khatah petrol pawisa 85 leh diesel pawisa 86-in a pun leh thu a sawi.

Phai lam atanga tuialhthei an lakna lamah harsatna lian tham a awm rih loh thu sawiin Pu K Lalnghakliana chuan, an duh anga tam erawh vawi 1-ah phurh theih loh chang an neih thu a sawi a; Mizoram tuialhthei dahkhawlna Oil Depot a la neih ve lo chu AMPEDA chuan an ngaimawh thu leh sorkar hotute hnenah pawh an thlen fo tawh thu a sawi a, Mizoram oil depot a neih vat theih nana hma la thuai turin sorkar hotute a ngen nghal bawk.

MNF PAC member Pu Ramthanmawia, MLA chuan Mizoram sorkar chu mipuite chungah harsatna thlentun ni a ti a, tuialhthei mana chhiah an lak mek chu ennawna titawp turin a phût tih Mizo Hnam Runa chung inkhawmah vawiin khan a sawi.

Pu Ramthanmawia chuan international boruak vanga petrol leh diesel man sang zel avangin Mizoram sorkar chu mipuite chung a harsatna thlentu tuialhthei mana cess an lak mek chu tihtawp a hun tawh hle a ni, a ti a; hmarchhak state-ah Mizoram chu tuialhthei man sang ber a ni tawh tih sawiin, mipui harsatna tawh mek hi thlirin sorkar chu inngaihtuah nawn tur leh tuialhtheia cess an lak chu ennawn a, titawp turin an phut tih a sawi.

<><><>

### BJP

Union Minister of State for Fisheries, Animal Husbandry & Dairying, and Panchayati Raj changtu Prof. S. P. Singh Baghel chuan Aizawla BJP Mizoram State Office Mipui Run tlawhin, BJP State President's Office Chamber-ah Dr. K. Beichhua, MLA leh State President kaihhruaina in inkawmna hun neih a ni.

Dr K Beichhua chuan, RGM Mission te, NLM leh RAS chungchangte sawipuiin, Ran vulh leh Sangha khawi lama tui kuthnathawktute tan tangkai tur thil hrang hrang a sawipui a, hei mai bakah hian Vawk pûl hri avanga vawk vulhtute harsatna tawh thin chungchang te pawh a sawipui a, AH & Vety Minister a lo nih tawh bawk avangin a ngaih pawimawh thu Union Minister hnen ah hian a hrilh a ni.

Prof SP Singh Baghel chuan BJP State President thu thlente chu a ngaih pawimawh hle thu a sawi a, BJP Mizoram hruaitute'na a Department chan hnuai Mizoram mipui harsatna chungchang an sawipui chu lawmawm a tih thu leh an thu thlen te a tul anga bawhzuisak a lo tiam thu a hrilh a, an thu thlen te chu a tul anga New Delhi lamah pawh bawhzui turin, a chah bawk a ni.

Union Minister chuan Mizoram harsatna te sutkian a nih theih nana a tam thei ang ber tlawh tura tih an ni a, Union Minister hrang hrang te pawhin Mizoram an lo tlawh thin reng a ni a ti a, Mizoram ah ngei pawh hian BJP Sorkarna an neih ve thuai theih nan theihtawp chhuah zel turin party hruaitute a chah bawk a ni.

<><><>

### MZP

Mizo Zirlai Pawl MZP chuan vawiin khan Tourism department director atana sorkarin Pi R Lalrodingi a ruat nawn duh lohna lantirin Tourism Directorate-a thawkte pisa kai tur an dang a; Tourism Director hi a bang emaw, ruat nawnna order hi sût emaw a nih loh chuan dang chhonzawm an rel.

Tourism Directorate pisa kai dannah hian MZP hian kawngkapui chu tala-in an kalh a, hrui pawtin Tourism Director ruat nawnna sût an duh thu leh mimal induhsakna an duh loh thute an tar a; police engemawzat an duty bawk. Buaina leh harsatna thleng loin vawiin tlai dar 4 khan pisa kai tur dan hi an titawp a; Tourism Director hi a bang emaw, ruat nawnna order hi sût emaw a nih loh chuan pisa kai tur dan chhonzawm an rel a ni.

Vawiina MZP-in Tourism Directorate-a pisa kai turte an dannaah hian MZP president C Lalremruata chuan, an hmalakna chu a mimala Pi R Lalrodingi an huat vang a nih loh thu leh mimal induhsakna lian tak a awm nia lang chu an duh loh ber a nih thu a sawi a, MZP chuan tun hma atang tawhin sorkar hnathawk pension rawih nawn hrim hrim hi an duh lo tawh thin a, thalai hna zawng mekte tan leh zirlai hmabak êng tak tak neite tan inrawih nawnna hi an duh lo tih sawiin, sorkar pawhin an hmalakna leh an aw a ngaihtlak ngei an beisei thu a sawi.

*VC- Pi R Lalrodingi hi kumin April ni 30 khan sorkar hna atangin superannuation pension-in a chhuak a, a pension lai hian Commerce & Industries Addl. Director*

Pension leh Tourism director leh OSD to CM a ni. Mizoram sorkar chuan May 1 atanga OSD to CM leh Tourism director hna chelh turin a ruai nawn leh a ni.

Rawih nawn a nih hnu hian thla khatah lawmman cheng 35,000 pek tur niin, sorkar hnathawk nghette hamthatna ang a nei dawn lo a; Mizoram sorkara secretary tlukpui a ni. OSD to CM atan hian tun sorkar term chhung atan co-terminus-a ruat a ni a; Tourism director a nihna chu joint director ni mekin seniority-ah director a nih theih hun thleng emaw, order dang awm leh hma emaw atan a ni tih appointment order-ah tarlan a ni.

Hemi hi MZP chuan duh loin, Chief Minister an sawipui hnuah Pi R Lalrodingi appointment order thar tihchhuah a ni a, OSD to CM-ah chauh ruat a nih thu tarlan a ni. Hetihlai hian May 22 khan Pi R Lalrodingi chu Tourism Director hna chelh tel tura ruatna order tihchhuah leh a ni a, hei hi duh loin MZP hian Tourism Directorate-a thawkte pisa kai tur hi an dang ta a ni.

<><><>

### HOME MINISTER

Home minister Pu K Sapdanga chuan police 350 lak leh tumin Mizoram sorkar a inbuatsaih mek tih sawiin, fair taka lak leh a nih dawn thu leh nikuma police 259 lak zingah ruihtheihthila buai an awm lo tih a sawi.

Pu K Sapdanga hian vawiin khan Aizawla ZPM pisaa chhung inkhawmah thu sawiin, sorkarin a phal angin police 350 lak leh tum a nih thu a sawi a, police (un-armed) 150 leh silai keng chi -armed 200, a vaiin 350 lak leh an tum a, nikumah fair takin lak a ni a, tuna lak leh tur pawh hi a fair leh hle ang, a ti.

Nikuma police 259 lakte chu an kawng kal dan atang ringawt pawhin an training tha tih a lan thu sawiin Pu K Sapdanga chuan, training chhungin ruihtheihthila buai an awm lo tih a sawi a; police-te inthununna leh fitness-ah tan an lak lehzual dawn thu a sawi. Police zingah lirthei emaw, ardali (orderly) emaw, danin a phal chin aia tam kawl an awm tawh lo nia an hriat thu sawiin, lo kawl ru an awm a, man chhuah palh an awm chuan langsar taka hrem an nih dawn thu a sawi.

Home Minister chuan police training uar an tum tih sawiin, senior officer-te pawh intuaihriamna neihtir tum a nih thu a sawi a; police tawh phawt chu vai tawng thiam ngei tura tih an ni ang, a ti bawk.

<><><>

### WEATHER

Indian Meterological Dept New Delhi hmuhlawk danin, Mizoramah naktuk atangin fur a intan dawn a,

Mizoram telin India Hmarchhak state hrang hrang leh Kerela ah te chuan ni 6 in fur hi a lo thleng hma dawn a, IMD, Aizawl Director Pu Sudheer Dwivedi-a chuan kum dangah chuan fur hi June thla bulah a intan thin a, kuminah erawh naktuk ni 26 ah a intan dawn ni a hmuhlawk a ni a ti a,

Fur intan hun tur hi chhut dan chi hrang hrang a awm a, Arabian Sea leh Bay of Bengal a thli beng lama zir te leh ruahsur dan a zir te in a ni a, he an chhutna atang hian IMD chuan fur intan tur thu hi a puang a ni.

Leimin tamna Mizoramah chuan mipuite fimkhur turin IMD Director chuan a chah a, hei bakah hian lirthei khalhtute pawh fimkhur turin a chah bawk a ni.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

### TRAFFIC

Aizawl Traffic Police chuan dan bawhchhiatna hrang hrang avanga khawpui chhunga lirtheia chetsualna thleng thin titem tur leh mipui him zawk nan Aizawl khawpui chhung hmun hrang hrangah lirthei endikna Special Drive an nei a; kar liamta Inrinni zan khan lirthei dan bawhchhia 74 an man.

Aizawl Traffic additional SP Pu Saidingliana Sailo chuan Akashvani News Aizawl zawhna chhangin, Special Drive hi May ni 23 zan khan an neih tan thu leh neih chhoh zel an tum thu a sawi a; mipui atangin thlawpna a that avangin a remchan dan angin neih chhoh zel a ni dawn a, a hun leh hmun tur erawh sawi lawk theih a ni lo, a ti a; lirthei khalhtute chu fimkhur tur leh mipui kawng kalte pawh fimkhur taka kawng kân thin turin a chah a ni.

Inrinni zan dar 9 hnu lam atangin Aizawl Traffic Police-te hian Special Drive hi an nei a, a tuk Pathianni zing lam thleng an duty a ni. Special drive-ah hian bike ri ring chi 12, license nei loa lirthei khalh 12, chak lutuk leh midang tana hlauhawm taka lirthei khalh 3, rui chung a lirthei khalh 4 leh helmet khum lo leh wrongside-a tlan bakah two wheeler-a mi 3 inphura tlan 43 an man bawk.

<><><>

### MPCC

Mizoram Pradesh Congress Committee chuan vawiin khan Congress Bhavan-ah political session an hmang a; thusawitu MPCC PAC member Pu Joseph Lalhimpua chuan Mizoram zirna chu politics khelh nan hmang lo turin political party-te leh politician-te a ngen.

Pu Joseph Lalhimpua chuan mithiam an tam tawh a, inelna pawh a sang tawh tih sawiin, quality education kalpui mek lai leh khawvel tukverha thalaite dah tawh laia MNF leh ZPM-ten zirna chu politics khelh nana an la hmang reng tih sawiin, sim tawh se a duh tih a sawi a; inthlan dawna vote zawna atana MNF-in school upgrade an ching chu zirna tichhetu leh buaina bul a nih thu leh ZPM sorkarin tun hnaia sikul 52 an provincialise chungchangah, tehfung atana hman 'The Mizoram Education Lumpsum Grant in Aid for General Maintenance of Private School Rules 2025' chu thingtlang sikulte tan tel ve ngaihna awm lo tluk a nih thu a sawi a; zirtirtu thahnemngai leh sikul chhan deuhthe transfer zel tinah ZPM sorkar a puh bawk.

<><><>

### PADMA AWARD

President Droupadi Murmu-i chuan zaninah Rashtrapati Bhavan-ah Civil mite chawimawina Padma Award 66 a sem. Vawiina award dawng zingah chawimawina sang ber Padma Vibhushan chu a thih hnuah Dharmendra Singh Deol leh Dr.N.Rajan te hlan an ni a. Dharmendra hi a nupui Hema Malini-in a dawnsak a ni. Award hlanna inkhawmah hian Vice President C P Radhakrishnan, Prime Minister Narendra Modi, Union Home Minister Amit Shah leh mi pawimawh dangte an tel a. President hian Padma Vibhushan pahnih, Padma Bhushan paruk leh Padma Shri 58 a sem dawn a. Kuminah hian President hian Padma Award 131 sem turin a pawm a. Vawiina sem bak hi remchang dangah sem leh a ni ang.

<><><>